

敬  
义  
堂  
诗  
集

第一卷

敬義堂詩集自序

光緒庚辰秋初有潮州之行江山之憑眺朋舊之周旋迭相唱和始效爲韻語時以藐孤之身甫離鄉塾年猶未冠學識淺拙率爾成章弗能工也其冬返里就向所肄業者尋繹之粗悟門徑然家居屢空資脩脯以養又馳騖於舉業倏忽十餘年雖流覽唐宋獨宗少陵模範王孟蘇陸諸家加以師友之講求性靈之觸發究未窺其堂奧猶弗工也中歲以後人事紛繁風雅益遠今且世閱滄桑年更晚暮覬覦進境已成弩末然翻觀舊稿平生神思所萃性眞所存遊迹所經遭際所歷偶一展

閱如昨日事雖烏啼蟲吟無當雅音而樵謳牧唱寧非  
天籟爰自庚辰至於癸丑輯爲五卷以附先君子花萼  
軒集後嗟夫幼不能讀父書長又闇于學東隅旣失桑  
榆詎復過庭詩教難繼前徽況於行實故皐魚之感常  
縈寤寐至於編集聊備省覽非以自炫陸務觀云文章  
不傳世自適常有餘意在斯乎意在斯乎

中華民國二年歲次癸丑十一月旣望薌田侯鼎芬序  
於象山之敬義堂 癸丑以後詩續附集中

敬義堂詩集序

夫詩以言志歷觀詩人之什凡風雨所感山川所經史

事所懷品物所寓莫不發爲吟詠以寫高深廣遠之思而後其詩可傳其志亦與之不朽吾師侯先生薌田承過庭之詩教時抗心以希古感變幻之世事或託興於毫端思之所發志亦存焉然高深廣遠當世鮮有能知者獨家君樽酒論詩時相過從且北游同寓唱酬尤密故生平蘊抱知之最悉曩歲以詩集屬家君爲之序奈郵筒拜領不旬日而家君齎志以歿吾師命振儒繼其志振儒自維譾陋何能贊一辭然志學多年獲循循善誘之益此事未敢固辭爰盟薇莊誦尋繹久之知吾師之詩窮而益工老而彌篤竊得其素志之所在非若吟

風弄月徒以絺章繡句爲能則此敬弁數言亦惟讀吾師之詩如見吾師之志云爾

中華民國十二年歲次癸亥初夏受業古振儒拜序

敬義堂詩集序

侯君薌田余內弟也其詩和平雅正適肖其人非若余之率意狂態漫無體律也今老矣句詠尤純昔蘇子由謂東坡居士晚年詩精深華妙無老人衰憊之氣謹以斯語移贈焉

中華民國十六年歲次丁卯正月黃炳垣星譜甫序

敬義堂詩集卷之一

庚辰集全

鶴山侯鼎芬薌田甫著

汕頭旅次

庚辰

翹首雲端雁幾行。家書頻寄慰萱堂。客途莫道鮑江遠。  
風景依稀似故鄉。

月夜潮陽舟中

旅思多從月夜生。六蓬舟小月中行。二千餘里同明月。  
月在潮陽分外明。

夜泊湘子橋

輕帆際晚泊湘橋。靈躅長留瘴癘消。話到神僊情亦幻。

夢迴鄉國路應遙。烟橫峻嶺籠寒月。浪撼孤城落夜潮。  
別緒已隨流水去。那堪還聽玉樓簫。

韓山懷古

戀

潮陽名勝聳蒼巒。無限晴暉縱目看。鱷渚澄清秋水濶。  
鳳城咫尺晚風寒。崢嶸直節留名易。金石雄文繼起難。  
剩有千秋遺愛在。好山長此共稱韓。

奎樓覽勝

榕陽傑閣峙崔巍。朱檻憑臨俯翠微。萬里晴光開旅望。  
滿城寒意待秋歸。山容樹色明殘靄。帆影江波帶夕暉。  
仰視鵬搏天路近。願同雲翼起高飛。

前題和馮君朗川

閒來覽勝綺窗西。粉堞江樓入望低。畫舫乘潮初放棹。  
茅茨繞郭半臨溪。新寒霜葉濃於染。向晚烟巒淡欲迷。  
撫景莫嫌斜日落。月明應許各分題。

同遊三元寺

清遊連袂興初長。荒寺臨溪護短牆。爲愛竹園招野趣。  
偶留蓮界坐秋光。客逢僧話茶烟活。局罷棋聲鶴夢涼。  
他日貯看題壁句。碧紗籠處墨猶香。

歸期臨發復登奎樓

登樓久客悲王粲。且喜還鄉獨詠詩。旅夢宵闌雞唱早。

歸程秋盡雁來遲。雨浮山翠橫窗列。風捲江聲入檻馳。  
何日重來更遊眺。榜舟猶識舊津涯。

次韻遊金山

樓閣參差映夕陽。秋來風景遍江鄉。漁歌隱約清商曲。  
遊侶蕭閒刺史堂。霜信近傳孤雁影。雲陰低護雜花香。  
同來山畔多幽趣。別蘚看碑字亦蒼。

舟中晚望黃岐山

縹緲雄山百仞秋。曾無短策御風游。高連庾嶺天南顧。  
平壓韓江水北流。目送層雲歸絕巘。身迎嵐翠下扁舟。  
潮來欲挾群峯去。解纜人喧晚渡頭。

早行二首 辛壬

紅日初生動鳥聲。悠揚歌管不勝情。桑園更值蠶眠後。  
十畝枝斜帶露輕。

江村曉色繪難成。拂露披風自在行。釣艇無人空自泊。  
隔溪剛聽賣魚聲。

荔陰閒詠

風爽蕭疏透葛襟。携琴閒倚荔枝陰。紅雲欲雨迷三徑。  
絳雪和烟護半林。靜撫絲桐清籟起。香霏瓊玉晚涼侵。  
海隅自昔多尤物。曾慰坡仙謫宦心。

石巖頭採茶歌二首

朝朝相約採新茶。天氣陰晴石徑斜。人自滿籃儂自少。  
石巖巖畔愛看花。

怕看雙飛蝶影斜。征人遙憶在天涯。東風詎識吹愁去。  
吹放巖前春雨芽。

舟行入端州

癸甲乙

放棹西行去。春山畫裏過。夜來江岸泊。空聽雨聲多。

中秋夜對月有懷

靜向空庭坐。懷人覺夜寒。團圓好明月。應是捲簾看。

有懷潮州馮君

故人無恙隔天涯。迢遞雲山入望賒。曾羨榕陽舊遊地。

春風亭院酒帘斜。

採桑曲

携籠陌上笑言譁。採罷柔桑日已斜。楊柳垂垂深巷曲。  
繅絲聲裏是農家。

曉霧

霧重天初曉。霏霏石徑西。鳥聲空際出。人影望中迷。遠  
鎖雙橋斷。橫鋪獨樹低。坐看晴日上。春水浸芳畦。

晴燕

槐陰幕幕柳絲絲。紫燕呢喃對語時。新霽園林斜照滿。  
碧欄人寂曝烏衣。

餘閒偶詠

茅亭向午綠陰移。淪茗清談竹繞籬。何似昨宵杯酒罷。  
醉乘涼月夜敲棋。

舟中見鷺鳥感賦

蒲帆低颺午潮平。鷺鳥翩翩兩翮輕。豐草長林留不得。  
還從江上御風行。

送友赴試院還作二首

人海喧闐結隊行。群思赤手掣長鯨。逸氣騰驤君莫笑。  
由來豪傑重科名。

鳥聲喚曉觸閒愁。靜裏憑欄曙色浮。十載文壇經苦戰。

雄心如昨此登樓。

歸夢

夢裏還鄉去。家山竟似眞。倚閭望遊子。覲面慰慈親。爲  
訊行程緩。猶疑旅况貧。曉鐘催早覺。驚起未歸人。

再遊鼎湖歸途口占三首

暮春時節雨初晴。來隱溪邊一棹輕。游興渾忘離寺遠。  
俗懷眞覺入山清。不聞鳥語和人語。惟訝泉聲作雨聲。  
曲徑漸通寒翠處。深深松桂自叢生。

古木參天晝亦昏。鐘聲遙雜瀑聲喧。巖巒蒼翠藏雲氣。  
水石舂撞灑雪痕。宿霧幾層侵客袂。晴嵐一角露禪門。

塵容未改今重到。暗惹山靈笑欲言。

華嚴樓閣梵王宮。萬種塵緣到此空。放眼恰從飛瀑外。  
賞心眞在慶雲中。何能宴坐看潭月。猶是催歸下晚風。  
難別仙源屢廻首。夕陽斜照入幽叢。

初夏詠蠅

瓶花低映小窗明。爐爇香沈氣倍清。何物營營聒幽夢。  
晝長人寂有蠅聲。

偶成

南風吹雨綠滿畦。早稻花明彌望齊。願得餘閒事農畝。  
年豐莫聽飢兒啼。

端午後江漲堤缺時老屋數椽水深三尺許徙宅  
而居因紀以詩

登高眺平原。水光連翠壁。禾黍沒已盡。草樹淡無色。渡  
傍昔垂釣。茫茫今澤國。欲行畏風浪。強留悶胸臆。既乏  
舟與楫。況能假羽翼。窮檐蓋藏空。學舍弦歌寂。索居山  
與隣。何異離鄉客。

八月廿一日上甘竹灘

暮宿黃連河。曉渡甘竹灘。緯舟石背行。浪急用力難。努  
力且向前。歷險乃得安。笑語驚隣舟。歡然理晨餐。魚市  
岸傍招。酒家三兩間。魚鮮酒更濃。酣飲酡朱顏。一醉臥

船頭惟聽水潺潺。醒時驟迴望。浮雲遮遠山。片帆飽秋風。瞬息抵鄉關。

### 曉起

老圃饒秋景。微寒盪曉烟。灌園啼鳥罷。芟草落虹邊。山淨分嵐翠。籬疏度澗泉。重陽知漸近。叢菊未開圓。

### 漫賦

平分功過計非宜。觀變沈機但再思。曾見老成善謀國。不操勝算未輕爲。

### 殘臘

殘臘霜寒奈歲何。難將杯酒却愁魔。貧來兩事真違願。